

Xajon ra inikasén-la jñà xita Hebreo

Kó'sín jè Nainá jé I'ndí-la síchjeén nga chja-ná

1 ¹Nga ti'sa klotseé jè Nainá kjín 'ka kiichja-la jñà xita jchínga-ná nga isichjeén jñà xita ra kiichja ngajo-la, nga kjín skoya tjín-ni kó'sín nga kiichja-la. ²Tanga 'ndi 'ndi nga ijye tífehe'ta nichjin, jè I'ndí-la tísichjeén nga tíchja-ná ra a'ta 'tse, ko tijé-ni ra isichjeén nga tsikínda isà'nde, jé isìngatsja ijye nga'tsì tsajmì ra tjín. ³Jè I'ndí-la, jè bakón tsijen-ná jè kjoajeya-la Nainá, ko jé bakón-ná kó'ki kjòn-ni ko kó'sín 'sín Nainá. Jè nga'ño-la 'én ra chja, jé itsabá'ño-ni isà'nde. 'Kia nga ijye isikijne nga kjomà isìtsje jé-ná, akjòn tsihijin ján ngajmi nga tsikijna'ta ya nga kixi-la Nainá.

Kó'sín kjòn jñà ìkjali ko jè I'ndí-la Nainá

⁴Jè I'ndí-la Nainá tíjna ítjòn; isaá 'ño 'nga tíjna koni jñà ìkjali, ta ngatji-la nga isaá 'ño chjí-la jè 'í ra ki'tsì-la.

⁵Nga jè Nainá, nijngo ìkjali ra ko'sín kitsò-la:

Jíí-nì ra I'ndí-na

ko 'aán-ná ra Na'in-li.

Ti'koaá nijngo ìkjali ra kitsò-la:

'Aán koma Na'in-la,

ko jè koma I'ndí-na.

⁶Jè Nainá, 'kia nga isikasén jè I'ndí-tjòn-la ya isà'nde, ti'koaá 'koaá 'sín kitsò:

Nga'tsì jñà ìkjali-na, katabexkón-ní.

⁷Tanga ra a'ta 'tse jñà ìkjali, kíí 'sín tsò:

Nainá, maá-la nga tjo 'sín jñà ìkjali-la.

Ko maá-la ní'í 'sín jñà chi'nda-la.

⁸Tanga ra a'ta 'tse I'ndí-la, tsó-ní:

Ji-ní Nainá, ko jí kotexomi ta mé nichjin-nioo,
ngi kixí nichjín jè kjotéxoma ra tjíya ndsìi.

⁹ Jé matsjachi jè kjoa ra nda tjín, ko jticha-ní jè kjoa ra 'cho
tjín.

'Koaá ma-ni, 'an ra Nainá-li 'mì-ná, xá tsjahjín-ila
nga isa nda jchaxkón-li ko isa tse kjotsja 'se-li
koni jñà xita xàngi.

¹⁰ Ti'koaá tsò-ní:

Ji ra tijna ítjìn, skanda ti'sa tjà'tsin-la kjoa;
jí tsikindi jè isà'nde,
ko jí tsikindi jè ngajmi.

¹¹ Ngaji, kijna-ní skanda ta mé nichjin-nioo;
tanga jè isà'nde ko jè ngajmi kjehe'tà-ní
ko kojchínga-ní koni 'sín ma jñà nikje nga majchínga,

¹² 'koaá 'sín kíxkóyi koni jngo nikje ra tsjayeé
ko 'koaá 'sín sikaatjìyi koni 'sín nga fahatjìya nikje.
Tanga ra ji 'koaá 'ki koma kji'ti,
ko jè nichjin-li mì kì kjehe'tà.

¹³ Nainá, nijngo jñà ìkjali-la kitsò-la:

I tijna'tá-ná ya chrja nga kixi-na,
skanda 'kia nga sikítsajnangia jñà kondra-li ya ñanda nga
inchasòn ndsàkì.

¹⁴ Nga jñà ìkjali, tà isén nichjin tsje-ní, ko yaá síxá'ta-la
Nainá; jñà nikasén nga basìko jñà xita ra tjábé-la kjonda nga
kitjokajin kjohi'in 'tse jé-la.

Kó'sín machjeén nga sikondeé jè 'én ra tsachrjejin-ná kjohi'in

2 ¹ Kíí machjeén-ní nga isa nda sisieén 'én ra ijye ina'yé,
mé-ni nga mì xìn ndiyá kjìn-né. ² Jñà kjotéxoma ra
Nainá kitsjà 'kia nga isichjeén jñà ìkjali jñà nichjin ra
ijye tsato, ki'seé-la kjohixi; ko jñà ra tsakátsji-jé nga mì kì
isìhitjasòn, ki'tsi-la kjohi'in koni 'sín nga bakèn-la jñà jé
ra tsakátsji. ³ Ti'koaá jíén, mì kì koma kjoaajno-ná kjohi'in
tsa mì kì sikondeé jè kjoa ra bato 'ñó chjì-la koni 'sín nga
ijye itjokàjieén kjohi'in a'ta 'tse jé-ná. Nga jé kjón Na'in-ná
kiichja ítjòn nga ma kítjojieén jé-ná; ko ra kjomà askan-nioo,
jñà nda kisichiya-ná jñà xita ra kíi'nchré kjòn-la jñà 'én kii,
nga ngi 'én kixi kiti-ní. ⁴ Nainá, ti'koaá isikixiyandaá kjoa
kii 'kia nga kjìn skoya kjoxkón tsakón ko 'kia nga isìka'bí

kjotjò ra tsjá jè Inìma Tsje-la; 'koaá 'sín kitsjá koni 'sín nga kjomejèn-la ra jè.

Yá ra bachrjekàjin-ná kjohi'in 'tse jé-ná

⁵Nga Nainá, mì tsa jñà ìkjali kitsjà-la nga jñà kotèxoma-la jè isà'nde ra 'sa nchrabá jè ra ìnchichibaya-ná. ⁶Tanga tíchjaá jngo 'ká xajon ra tjí'ta 'én-la Nainá ñándá nga tsò:

Jì Na'in, ¿yá-ni ra jñà xita?

¿A bakén-la nga ko'sín jì makájno-li nga níkítsjin ra a'ta 'tse?

⁷Ta chibaá nìchjin ko'sín isa nangi iníkjini koni jñà ìkjali. Tanga ra kjomà askan, ki'tsì-la jì kjoajeya ko ndaá iníkjina-ni nga kijchaxkón;

⁸ko nga'tsì tsajmì, yaá iníkítsajnangi ijyi ya angi ndsako [mé-ni nga jè kotèxoma ijye-la].

Jè Nainá, 'kia nga ko'sín ya tsikíhijyongí ijye ya angi ndsako, 'koaá 'sín chja-ni nga nímé tsajmì tjín ra mì tsa jè tíbatéxoma-la. Tanga takó kjè kì nda 'ya-la tsa jè tíbatéxoma ijye-la nga'tsì tsajmì. ⁹Tanga 'ndì, machiya-ná nga jè Jesús, ni'sín nangi iníkjina chiba nìchjin koni jñà ìkjali, tanga 'ndì 'ndì, jeyaá tíjna, ko 'ngaá tíjna nga tíbatéxoma, ta ngatji-la kjohi'in ra isìkjiín 'kia nga 'ken. Ngi tà kjonda 'tse Nainá-ní nga ko'sín jè tsatojin ngajo-la kjobiya nga'tsì xita.

¹⁰Kjoa kixíí ra ki'sín Nainá, jè ra tsikínda nga'tsì tsajmì ra tjín, 'kia nga ko'sín isikatojin kjohi'in I'ndí-la, mé-ni nga jè kjohi'in ra tsatojin I'ndí-la, 'koaá 'sín isìko nga nímé ra ichija'ta-la, mé-ni nga jè koma kochrjekàjin kjohi'in nga'tsì ìxti-la Nainá ra jè mejèn-la nga ya kítsajnako ñándá jeya tíjna ra jè. ¹¹Nga jè I'ndí-la Nainá, jé sítsje xita ra tjín-la jé, ko jñà-ní xita ra sítsje, tajngoó Na'in ma-ni. 'Koaá 'sín ma-ni nga mì kì masabà-la nga 'ndse tsò-la jñà xita ra sítsje. ¹²Jè xajon-la Nainá, 'koaá 'sín tíchja nga tsò:

'Kenájmí-la jñà 'ndsèe ra a'ta tsaji,

ko seé-la ra jì ya ajin xita naxindá-li.

¹³Tí'koaá tjí'ta ñándá nga tsò:

Jé Nainá ma'ñó'ta ikon.

India tjí'ta-isa ñándá nga tsò:

Íí tjínako jñà ìxti ra Nainá kitsjà-na.

¹⁴'Koaá 'sín t́jín koni j́nà ixti-la xítà nga tajngo jní kò tajngo ijo-ní; 'koaá t́'sín jní kò ijo ki'se-la jè Jesús mé-ni nga a'ta 'tse kjobiya-la ma isikijne-la jè xítà-níí ra t́jín-la nga'nó nga ma-la sí'ken xítà. ¹⁵Jesús, 'koaá 'sín kjomà'tin mé-ni nga kjomà isíkítsajnandíí-ni nga'tsì xítà ra ki'ta nìchjin inchtsakjón-la jè kjobiya, nga 'koaá 'sín títsajna koni tsa t́jté'nó-la nga kó'ki nìchjin bìtsajnakon. ¹⁶Jesús mì tsa ki xá 'ji-ni nga j́nà ikjalì kosìko, kií xá 'ji-ni nga j́nà kosìko ra xítà tje-la Abraham. ¹⁷'Koaá 'sín kjomà-ni nga jè Jesús t́jínè-la nga kò'sín ngàsòn kjomà koni j́nà xítà 'ndse, mé-ni nga kjomà na'mì ítjòn kjomà-ni ra t́jín-la kjohimatakòn ra nda síhitjasòn xá-la Nainá, nga kjomà tsikíchjítjì jé-la xítà ra a'ta 'tse kjobiya-la. ¹⁸Koni 'sín nga kisìkjiín kjohi'in nga itjá'ta ra jè, 'koaá t́'sín ma-la kosìko j́nà xítà ra sìikjiín kjohi'in 'kia nga t́já'ta.

Kó'sín Jesús isaá jeya t́jna mì 'koa-ni koni jè Moisés

3 ¹Jìòn ndí 'ndse ra xítà naxindá tse 'mì-no ra xá kò'sín kiichja-no Nainá nga xítà 'tse kítso-no, 'koaá 'sín nda tikítsjen koni 'sín nga makjiín-ná nga jè Cristo Jesús ra xá Nainá tsikíxá-la kò nga na'mì ítjòn isíkijna. ²Jesús, 'koaá 'sín nda tíshitjasòn jè xá-la Nainá ra xá kò'sín ki'tsi-la, koni 'sín nga jè Moisés ndaá isìhitjasòn xá-la ya a'ta 'tse naxindá-la Nainá. ³Tanga jè Jesús, isaá jeya t́jna koni jè Moisés. 'Koaá jngoya-la koni jngo xítà ra bínda ni'ya, isaá jeya bijna ra jè, nda mí 'koa-ni jè ni'ya ra bínda. ⁴Nga'tsì ni'ya, tsijen xítaá bínda; tanga jé Nainá ra tsikínda ijye nga'tsì tsajmì ra t́jín ya isà'nde. ⁵Ra ngi kjohixi, jè Moisés, koni xítà chí'nda-la Nainá, nda isìhitjasòn xá-la ya ajin naxindá-la Nainá. Kií xá ki'sín nga jè kitsjà 'én kó'sín kítso Nainá ra koma askan-ni. ⁶Tanga jè Cristo, ra l'ndí-la Nainá ma, jé batéxoma a'ta 'tse naxindá-la; kò jè naxindá rakìdò, jién-né tsa ngi kixi kítsajneé skanda 'kia nga kjehe'tà nìchjin koni 'sín nga 'nó kji'tatakén nga ngi kòó kjotsja-ná inchichiñá-lá kjonda-la Nainá.

'Kiá nga kitjáha'seén nándà sikhjáyeé a'ta 'tse Nainá

⁷'Koaá 'sín tsò jè Inìma Tsje-la Nainá ya xajon ra t́jítà 'én-la Nainá nga tsò:

Tsa inchina'yá jìòn 'ndì 'ndì-nì jè 'én-la Nainá,

⁸ kì tà chjàn nítája inìma-no koni 'sín ki'sin jñà xítà ra kondra kùl-là Nainá nga iskó'ta ya ì'nde'taxìn ñánda-nioo nga nangi kixì.

⁹ ['Koaá ma-ni nga ko'sín kitsò Nainá:]

Jñà xítà jchínga-no iskó'tá-na, kò ichán nó kijtse jñà kjoa ra kí'siaan.

¹⁰ 'Koaá 'sín ma-ni nga kísíjchán-kò jñà xítà kù,

kò 'koaá 'sín kíxian-la: “Jìòn, kji'tá nìchjin ta kji'í 'sín ndiyá fìkò-no jè inìma-no, kò majìn-no nga chjìbé jè ndiyá-na.”

¹¹ 'Koaá ma-ni nga 'kia nga 'ñó kjoiti-na, kítsja-ná 'én-na nga kíxian:

“Mì kì kjoaha'sen-jin ya ì'nde-na ñánda-nioo nga ma níkjáya.”

¹² Ndí 'ndsé, nda tìkindaa ijo-no; kì nijngo jìòn ra kjoa'cho síkíjnajin inìma-là nga mì kì makjìín-là mé-ni nga mì kòsen'taxìn-là Nainá ra tíjnakon. ¹³ Ta isaá 'tì nga'ñó-là xàngioo nga jngó jngó-no nga nìchjin nchijòn 'kia nga tíjna-isa jè nìchjin, mé-ni nga niyá ra ya kotájajín-ni jè kjoa 'tse jé ra skoóndacha-là. ¹⁴ Jién, yaá nakjoá-né ya a'ta 'tse Cristo, tsa ngi ko'sín nda kòkjiín-ná skanda 'kia nga kjehe'tà nìchjin koni 'sín nga kjokjìín-ná nga tì'sa ítjòn.

¹⁵ Xajon ra tíj'ta 'én-là Nainá, 'koaá 'sín tíchja nga tsò:

Tsa ìnchina'ya jìòn 'ndì 'ndì-nì jè 'én-là Nainá,

kì tà chjàn ko'sín nítája inìma-no koni 'sín ki'sin jñà xítà ra kondra kijì-là Nainá.

¹⁶ ¿Yá xítà-ni ra kíí'nchré 'én-là Nainá kò akjòn kondra kijì-là? Jñà-ní nga'tsì xítà ra jè Moisés tsachrjekàjin ya ì'nde Egipto.

¹⁷ ¿Kò yá xítà-ni ra ichán nó isíjchán-kò jè Nainá? Jñà-ní xítà ra tsakátsji-jé kò yaá 'ken ya aya ndiyá ya ñánda nga nangi kixì. ¹⁸ ¿Kò yá xítà-ni ra Nainá ko'sín kitsò-là nga mì kì kjoaha'sen-jin ya ì'nde-là ñánda ma níkjáya? Jñà-ní xítà ra mì kì isihitjasòn-là. ¹⁹ Kò 'koaá 'sín tísijin-ná, nga kíí mì kì 'jaha'sen-jin-ni ya ì'nde ñánda ma níkjáya ta ngatjì-là nga mì kì kjokjìín-là.

4 ¹ 'Kia nga takó tíjna-isa 'én-là Nainá ra ijye kitsjà nga ma kitjáha'seén ñánda nga tíjna ì'nde-là ñánda ma níkjáya, tíjné-là nga nda síkondeé ijo-ná tsa kíí nìchjin-ni mì kì koma kitjáha'sen i'ka. ² Jién ijyee tí'senajmí-ná 'én xítse ra nda tsò

koni 'sín ki'senajmí-te-la jñà xīta jchínga-ná. Tanga ra jñà, ta kjoṭjò-ni nī'sín ki'senajmí-la, nga mì kì ngàsòn kjokjiín-la koni jñà xīta ra i'ka ra isìhitjasòn jñà 'én kī. ³Tanga jién-né ra ijye makjiín-ná kitjáha'seén ya i'nde ñánda ma níkjáya. Koni 'sín kitsò Nainá:

'Koaá ma-ni nga ngi koṭ kjoṭji-na nga kítsja 'én-na nga ko 'sín kíxian

nga mì kì kjoaà'sen-jin ya i'nde-na ñánda ma níkjáya. Nī'sín jè xá-la Nainá ijyeeé kjoṭseé ijyeh'e'tà, skanda tī'kia-ni nga isinda isà'nde. ⁴Jè xajon ra tjí'ta 'én-la Nainá, 'koaá 'sín tíchja a'ta 'tse nìchjin ra ma-ni ito nga tsò:

Ra ma ito nìchjin kisíkjáyaá jè Nainá nga ijyeh'e'tà ijye xá-la.

⁵Tijé-ni jè xajon ra tjí'ta 'én-la Nainá india tíchja-isa nga tsò:

Mì kì kjoaà'sen-jin ya i'nde-na ñánda nga ma níkjáya.

⁶Jñà xīta ra kí'nchré íjòn 'én ra nda tsò mì kì 'jaha'sen ya i'nde rakī ta ngatjì-la nga mì kì isìhitjasòn; tanga takó chijaá i'ka xīta nga kjoaha'sen ya i'nde rakī. ⁷'Koaá ma-ni jè Nainá tsikíjna ìjngo-isa nìchjin, jè nìchjin 'ndi 'ndi, koni 'sín kìchja David a'ta 'tse, 'kia nga askan-nioo nga tíchja ya xajon ra tjí'ta 'én-la Nainá nga tsò:

Tsa 'ndi 'ndi nga inchina'yá jìon jè 'én-la Nainá, kì tà chjàn nítája inìma-no.

⁸Koni jè Josué mì kì kjomà kitsjà-la nìchjin níkjáya jñà xīta Israel, kí ko'sín askan-nioo, Nainá isìkàxki ìjngo-isa nìchjin níkjáya. ⁹'Koaá ma-ni jè naxínda-la Nainá tíjna ìjngo-isa-la nìchjin ñánda nga ngi sīkjáya. ¹⁰Nga jè xīta ra 'faha'sen-jin ya kjoa níkjáya-la Nainá, tī'koaá síkjáya-ní ra kjoa 'tse xá-la koni 'sín isíkjáya jè Nainá ra a'ta 'tse xá-la. ¹¹Machjeén-ní nga 'kì nga'ño-lá ijo-ná nga kitjáha'sen-jieén ya kjoa níkjáya-la Nainá, ko mì kì ko'sín 'sieén koni 'sín ki'sìn jñà xīta ra mì kì isìhitjasòn.

¹²Jè 'én-la Nainá tíjnakon-ní ko tjin-la nga'ño; isaá ta nda bate nda mí 'koa-ni koni jngo kicha ndajò ra ijò nga jò 'ka; 'faha'sen-jin-ní skanda ya ajin inìma-ná ko ya ajin kjobítsjen-ná; tī'koaá 'faha'sen-jin-ní skanda ñánda tíkjo ninda-ná ko bijchó skanda ya aya-la; kjó'tajin-ní kótsò kjobítsjen ra tjin-jin ya ajin inìma-ná ko mé ra mejèn-la nga 'sijn. ¹³Nga'tsì ra Nainá tsikínda, nímé ra tjí'ma a'ta 'tse; nga

nga'tsì kjoa, tjin tsijen ijyee-ní ya ngixkõn jè ra tjinè-la nga 'ki-lá kinda.

Mé xá ra tjin-la ra ngi jè saba na'mì ítjòn

¹⁴Ndi-ni nga ijye 'yee nga tjna jngo-ná ra ngi jè saba na'mì ítjòn, jè ra 'mì Jesús ra I'ndí-la Nainá, jè ra 'jaha'sen-jin ngajmi ya ngixkõn Nainá, 'koaá ma-ni nga machjeén-ní nga kixi kitsajnee a'ta 'tse 'én ra makjiín-ná. ¹⁵Nga jè na'mì ítjòn ra tjna a'ta tsajién, maá-la kohimake-ná tsa 'kia mé kjoa ra mejèn kajieén; nga jè, 'koaá ti'sín itjá'ta koni 'sín sa'koa tjá'té ra jién; ta jé-ní nga nikjiá tsakátsji-jé ra jè. ¹⁶Koaá ma-ni nga ngi kijingo-lá takén nga sichraña'ta-lá ya ñánda tibatéxoma Nainá ra tjin-la kjonda, mé-ni nga skehimatakòn-ná ko sakó-ná kjonda-la nga kosiko-ná 'kia kjòn nga tímachjeén-ná.

5 ¹Nga'tsì jña ra na'mì ítjòn, yaá tjahíjin ya ajin 'tse xita naxindá mé-ni nga chjatji-ni xita naxindá ya ngixkõn Nainá ko mé-ni koma tsjá-la kjotjò Nainá ko si'ken cho ra ta ngatji kjoa 'tse jé-la xita. ²Koni jè na'mì, sa'koaá mahindaá-te iníma-la, 'koaá 'sín ma-ni nga ma behíma jña xita ra mì kì machiya-la ko jña ra xìn ndiyá tjimaya. ³Ta ngatji-la kjoa ra ma'tin, kisi'keén-te cho ra kjoa 'tse jé-la koni 'sín nga isi'ken cho ra kjoa 'tse jé-la xita naxindá.

⁴Niyá ra tà jè tajngo bí'ta ijo-la jè xá'nga ra kii; tà jé-ní jè ra xá Nainá chja-la koni 'sín nga jè Nainá kiichja-la jè Aarón. ⁵Koaá ma-ni nga ti'koaá Cristo, mì tsa tijè 'nga isíkijna-ni ijo-la koni na'mì ítjòn; jè Nainá-ní ra kitsjà-la jè xá 'nga rakii, 'kia nga kitsò-la:

Jí-ní ra I'ndí-na,
ko 'aán-ná ra Na'in-li.

⁶Tijé-ni xajõn ra jí'ta 'én-la Nainá india-isa tíchja ñánda nga tsò:

Jí-ní ra na'mì tijni skanda ta mé nichjin-nioo,
jè xá-li, 'koaá ti'sín tjin koni jè xá ra ki'se-la jè ra tsi'kìn
Melquisedec.

⁷Jè Cristo 'kia nga tsikijna i isà'nde 'ño kiichja'ta-la Nainá, ngi koó ndáxkõn tsikítsa'ba-la ko isíjé'ta-la jè ra tjin-la nga'ño nga ma-la kochrjekàtji a'ta 'tse kjobiya; jè Nainá kí'nchré-la ta ngatji-la nga 'ño nda kijtsexkón. ⁸Jè Cristo, ni'sín I'ndí-la Nainá ma, yaá kjomà-la isihitjasòn 'kia nga

isìkjiín kjohi'in. ⁹'Kia nga mì tì mé ra ichija'ta-la, 'koaá 'sín kisijna nga jè kochrjekàjin kjohi'in xita skanda ta mé nichjin-nioo, nga'tsì ra s'hitjasòn-la. ¹⁰Jè Nainá, 'koaá 'sín isíkijna Jesús nga na'mì ítjòn kjomà; kitsjá-la xá koni jè xá ra ki'se-la Melquisedec.

Kó kjòn ra kjè nda machiya-la

¹¹A'ta 'tse kjoa kii, kjín jchán tjín-ni ra ma 'senajmí-isa-najìon, tanga 'nó chjá tjín kó'sín nga 'senajmíya ta ngatjì-la nga 'nó i'in machiya-najìon. ¹²Tsa nda kjòn-ni tsiki, ijyee-la kjotsee maestro 'nó nda ma jìon; tanga takó machjeén-najìon nga chjítáyá xitse india-no 'én-la Nainá kó'sín ma'tsia kjòn-ni jñà ra isa chiba chjá tjín. 'Koaá 'sín kjomà india-najìon koni kjòn ndí ixti-xó ra takó tsjín 'bi nga kjè tsa ma-la bakjèn niño. ¹³Nga'tsì ra takó kó'sín kjòn koni kjòn ra tsjín 'bi, ixti-ní, nga kjè kì machiya-la kó'sín tjín ra kjoakixi. ¹⁴Tanga tà jñà ma bakjèn niño ra ijye xita jchínga, jñà ra ijye nda machiya-la mé kjoa ra nda tjín kó mé kjoa ra mì kì nda tjín, nga ijyee kó'sín kjònga-la.

6 ¹Machjeén-ní nga nda katamajchá kjobítsjen-ná a'ta 'tse Cristo nga mì tsa ta jñà chjítáyáko k'ité jñà 'én ra ichitáyé nga 'sa ítjòn; nga mì tsa ta jñà sikítsjen-yá kji'té jñà kjoa ra ma'tsia-ni nga basikò'ta-ná, koni jñà kjoa, nga iníkájneé kjoa ra 'tse jé-ná nga mì tì jé tsakátsji-né jè ra ndiyá kjobiya fiko-ná tsiki; tì'koaá mì tsa ta jè chjítáyáko k'ité jè kjoa 'tse koni 'sín nga kjokjiín-ná a'ta 'tse Nainá, ²kó a'ta 'tse kjotéxoma ra 'tse kjoa satínda, kó 'kia nga fasón-lá ndsee xàngieé, kó kjoa ra faháya-ila mi'ken, kó kjoa 'tse 'kia nga kii'ndajín-ná Nainá mé ra kòko-ná skanda ta mé nichjin-ni. ³'Koaá 'sín ma chjítáyé 'én-la Nainá ra siijchá kjobítsjen-ná, tsa jè tsjá'nde nga kó'sín koma.

⁴Nga jñà xita ra ijye asa kjohisen-la kjobítsjen-la kó ra ijye asa tsikitsajin kjonda ra 'tse Nainá kó ra taña isíngàsòn-kò-ná a'ta 'tse Inima Tsje-la Nainá, ⁵jñà ra tì'koaá ijye asa tsikitsajin jè 'én nda-la Nainá kó nga'nó-la ra 'tse isà'nde ra 'sa nchrabá, ⁶tsa xìn ndiyá kiji nga tsjín 'én-la Nainá, mì kì tì konda-ni jñà kjobítsjen-la nga koáafa'ta india-ila Nainá, nga 'koaá ngoya-la koni tsa tijñà inchibá'ta india-ni krò jè Cristo, kó kosen masen nga siisabà'tin. ⁷'Koaá ngoya-la koni jè nangi 'kia nga 'ba

jtsí, ma'nchi'nde-ní. Tsa nda xka ra kiso ra kochjeén-la xita ra síxáko nangi, Nainá siichikon'tin nangi. ⁸Tanga tsa na'yá chi'ni ko tsa na'yá xi'nchro kiso, mi kì mé chjí-la jè nangi rakíi, mi tsa nangi nda ya ngixkon Nainá; kijchó nichjin nga jti.

⁹Jìon ndí 'ndsè ra tsjacha-lajin, ni'sín ko'sín nakjoá-jin, 'koaá 'sín kixi machiya-najin nga isaá ta nda koma'tin-isa jìon nga tjábé-no jè kjonda ra tjiko 'kia nga ko'sín bíjtokajieén kjohi'in. ¹⁰Nga Nainá, ngi kjoakixíi ra 'sín, nga mi kì siijchàhahjin jè xá-no ko jè kjotsjacha ra tjín-no nga nda inchinìsin-la jñà xita naxindá-la Cristo koni 'sín takó inchi'nià skanda 'ndi. ¹¹Tanga ngajin, 'koaá 'sín mejèn-najin nga ngi koó kjotsja-no ko'sín tixá nga jngó jngó-no skanda ta kjiá-nioo, kóhonda katabitjasòn kjoa ra inchichiñá-la. ¹²Majin-najin nga katama'tsè jìon. Ta isaá jnchro jñà chjíngi-la jñà xita ra ijye inchitjábé-la kjotjò koni 'sín ijye kitsjà tsa'ba Nainá ta ngatjì-la nga nda makjín-la ko nda inchichíjkoako-la.

Kó'sín Nainá kitsjà kixi-la tsa'ba jè Abraham

¹³Nainá, 'kia nga kitsjà-la tsa'ba jè Abraham, 'koaá 'sín kitsjà kixi 'én-la ra tijè tsasén-ni 'kia nga mi tì yá tjín-ni ra isa 'nga tjina koni ra jè; 'koaá 'sín kiichja ¹⁴nga kitsò: “An, 'ño nda sichíkon'tin-la, ti'koaá 'ño kjìn koma jñà tje-li.” ¹⁵'Koaá 'sín kjomà-ni nga jè Abraham iskoñákjoa-ní, akjòn itjábé-la koni 'sín kitsò-la jè Nainá. ¹⁶Jñà xita isà'nde, 'kia nga tsjá tsa'ba, jè síxaxki jè ra tjina ítjòn-la. 'Kia nga ko'sín tsjá 'én-la, ta yaá fehe'ta kjoa, mi tì mé ra joóya-isa-ni. ¹⁷'Koaá 'sín kjomejèn-la Nainá nga nda kjón tsakón-la jñà xita ra tjábé-la kjotjò koni 'sín ijye kitsjà-la tsa'ba nga 'koaá 'sín tjíjngo ikon nga sihitjasòn ko nga nimé ra siikaatjìya-la. Kíi ko'sín kitsjà-ni 'én-la ra 'ño xkón tjín 'kia nga ko'sín kitsjà tsa'ba. ¹⁸Jñà 'én kii ra jò ma-ni, ra mi kì ma kjoaatjìya-la, ko mi kì ma skoóndacha-ná Nainá, yaá sakó-ná jngo kjoajetakòn ra 'ño tjín, nga'tsí-né ra inchifatsjieé nga jè Nainá kosíko-ná ko jién ra ko'sín tjíjngo takén nga inchichiñá-lá koni 'sín nga ijye kitsjà tsa'ba nga tsjá-ná. ¹⁹Jè kjoakixi ra inchichiñá-lá, 'koaá 'sín síkijna kixi iníma-ná koni jngo kichá ra sité'ño-ni chitso; ko kjoakixi rakíi skanda maá 'jaha'sen-jin ya i'nde tsje nándá tja'bájto jngo nikje, ²⁰ya nándá 'jaha'sen Jesús

nga iski'xa'nde-ná ndiyá nga na'mì ítjòn tsikijna nda ta mé nichjin-nioo koni jè Melquisedec.

**Jesús, 'koaá 'sín jngoya-la koni jè na'mì ítjòn
ra tsi'kin Melquisedec**

7 ¹Melquisedec xitaxá ítjòn tsikijna 'tse naxindá Salem, ti'koaá na'mì ítjòn 'tse Nainá ra tjna ngajmi tsikijna-te. Kiikjá indiaá jè Abraham 'kia nga tínchrabá-ni nga ijye isikijne ijye-la xitaxá ítjòn ra iskajàn-ko, ko jè Melquisedec yaá isíchikon'tin jè Abraham. ²Jè Abraham, teya ki'sin nga'tsi tsajmi ra isakò-la 'kia nga kijì kjojchán ko jngo-yá kitsjà-la jè Melquisedec tsajmi kii. 'Í ra 'mì Melquisedec, 'koaá tsò-ni: Xitaxá ítjòn ra Kixi Tjna; ko nga jè ra xitaxá ítjòn 'tse Salem 'mì, Xitaxá ra Tjin-la Kjo'nchán, tsò-ni. ³Jè Melquisedec mì kì 'ya-la tje-la, yá-ni na'in-la ko yá-ni na-la, ñánda kitsin ko ñánda 'ken; 'koaá 'sín mangásòn-ko koni jè Cristo ra I'ndí-la Nainá, nga ti'koaá na'mì ítjòn tjna skanda ta mé nichjin-nioo. ⁴Jìon tikítsjen nga 'ño 'nga tsikijna jè Melquisedec nga skanda jè xita jhínga-ná Abraham teya ki'sin nga'tsi tsajmi ra isakò-la 'kia nga kii kjojchán nga jngo-yá kitsjà-la jè Melquisedec. ⁵Kixií kjoa, 'koaá 'sín tíchja kjotéxoma-la Moisés ra Nainá kitsjà-la; nga jña xita naxindá tjinè-la nga teya siijòya tsajmi ra tjin-la nga jngoya tsjá-la jña na'mì ra tje-la Leví ni'sín ti xita xákjén-ni jña ra tiya nchrabá-ni tje-la Abraham. ⁶Tanga jè Melquisedec mì tsa tje-la Leví-jin, tanga itjábé-la ra jngoya bako-la tsajmi ra teya ki'sin jè Abraham, akjòn 'kiaá isíchikon'tin; ni'sín jè kjòn-ni Abraham ra ko'sín itjábé-la 'én a'ta 'tse Nainá 'kia nga kitsjà-la tsa'ba. ⁷Koni 'sín tjíjin-ná nga'tsi-ná, jè ra síchikon'tin, isaá 'nga tjna mì 'koa-ni koni jè ra machikon'tin. ⁸Jña na'mì ra tjábé-la ra jngoya bako-la ra teya 'sín xita naxindá, mì tsa ta kíhijyo ki'ta-jin, tanga jè Melquisedec, 'koaá 'sín tí'ta xajon-la Nainá nga 'koaá 'sín 'ya-la koni tsa jngo xita ra takó tijnakon. ⁹Jña na'mì ra nchrabá-ni tje-la Leví ra tjábé-la ra jngoyá bako-la ra teya 'sín xita naxindá, komaá kokixé nga ti'koaá jè Melquisedec kitjábé jngoya-la a'ta 'tse xita kii 'kia nga ko'sín jngoyá kitsjà-la Abraham. ¹⁰Nga jè Abraham, ijyeé yaá 'ya tje-ni ra kjomà Leví, 'kia nga ko'sín iskajin Abraham jè Melquisedec.

Ra jò skoya na'mì

¹¹ Jñà kjotéxoma ra itjábé-la jñà xita Israel yaá inchrabà'ta-ni a'ta 'tse na'mì ra tje-la Leví; tanga jñà na'mì kii, mì kì kjomà-la nga ngi kixi isíkítsajna jñà xita, 'koaá 'sín kjomà-ni nga kj'íí na'mì 'ji jngo-isa ra ya mangásòn-ko Melquisedec ko mì tsa jè mangásòn-ko na'mì ra tje-la Aarón. ¹² 'Kia nga xìn chja-ni na'mì ra 'faha'sen 'kia nga fahatjìya, kjo'ñoó tjin-ni nga fahatjìya jè kjotéxoma. ¹³ Koni 'sín tíchja 'én-la Nainá, jè ra itjábé-la xá koni 'tse Melquisedec, kj'íí tje-ní; nì kjè sa jngo na'mì bitjokàjin ya nándà nga inchrabà'ta-ni. ¹⁴ 'Koaá 'sín nda 'ya-la nga jè Na'ín-ná Jesucristo, yaá inchrabà'ta-ni tje-la 'tse naxindá Judá; ya tje-la naxindá rakii, mì kì tsijen isikàxki jè Moisés 'kia nga kiichja ra a'ta 'tse jñà na'mì.

¹⁵ Nga'tsi kjoa kii, isaá makixiya-ná 'kia nga jè na'mì xitse ra 'faha'sen, 'koaá 'sín 'sín koni ki'sin jè Melquisedec, ¹⁶ nga mì tsa a'ta 'tse kjotéxoma inchrabà-ni nga ko'sin na'mì kjomà; tà jé-ní nga tse nga'ñoó tjin-la ko mì yá ra koma-la sii'ken. ¹⁷ Nga 'koaá 'sín tíchja Nainá ra a'ta 'tse, nga tsò:

Jíí-ní ra na'mì tijni skanda ta mé nichjin-nioo,
yaá mangásòn-ki jè Melquisedec.

¹⁸ 'Koaá 'sín kjomà-ni nga iskajen-ngi jè kjotéxoma jchínga, ta ngatjì-la nga mì kì ki'se-la nga'ñoó, ko mì kì itjasòn-la koni 'sín nga tjinè-la nga sihitjasòn. ¹⁹ Nga jè kjotéxoma jchínga ra kitsjà jè Moisés nimé ra isikixiya xita; tanga nichjin 'ndi 'ndi, tjin jngo-ná kjoa ra inchichiñá-lá ra isa nda tjin jè ra síchraña'tà-ná Nainá.

Kó'sín jé Jesús tíjna ítjòn-la koni jñà na'mì ra kj'íí

²⁰ Jñà kjoa kii, mì tsa ko'sín mì kì kitsjà tsa'ba Nainá; koni jñà na'mì ra i'ka, ra ta 'koaá 'sín itjábé-la xá, mì tsa yá ra kitsjà 'én-la. ²¹ Tanga ra a'ta 'tse Na'ín-ná Jesús kitsjà tsa'ba Nainá jè 'én ra 'ñoó xkón tjin 'kia nga kitsò:

Na'ín-ná, 'koaá 'sín ijye kitsjà kixi 'én-la ra 'ñoó xkón tjin,
ko mì kì tì sikaatjìya-ila jè kjobítsjen-la 'kia nga kitsò:
“Jíí-ní ra na'mì tijni ta mé nichjin-nioo.”

²² 'Koaá 'sín ma-ni nga jè Jesús basèn-tjì-ná 'kia nga jè Nainá tsikíndajínko jñà xita jngo kjoa ra isa 'ñoó nda tjin. ²³ Jñà na'mì ra tje-la Leví, 'ñoó kjín ma-ni, ta ngatjì-la 'kia nga jngo biya,

ta yaá fehe'ta xá-la, ñjngo na'mì xákjín 'faha'sen ngajo-la 'kia nga biya. ²⁴Tanga jè Jesús tǐjna-ní skanda ta mé nichjin-nioo ko mì tsa kjoaatiya jè xá-la nga na'mì tǐjna. ²⁵'Koaá 'sín ma-ni nga ma-la bachrjekàjin kjohi'in jǎà xita nita mé nichjin-nioo, nga'tsi ra a'ta 'tse Jesús bijchó-ni ya ngixkon Nainá; ko jè Jesús tǐjnakon-ní nita kjiá-nioo mé-ni nga ma bítsa'batji-ni jǎà xita.

²⁶Ngi jé kjón-ní Jesús jè na'mì ítjòn ra machjeén-ná: nga xita tsje-ní; ko mì tsa jé tǐjn-la; ko mì tsa tjé 'ki ya ajin iníma-la; xìn tǐjna-la jǎà xita ra jé tǐjn-la; ko jè-ní ra isa 'nga tǐjna ya ján ngajmi. ²⁷Mì tsa ko'sín 'sín koni 'sín jǎà na'mì ra i'ka nga nichjin nchijón-ní sí'ken cho ra tsjá kjotjò ra kjoa 'tse jé-la, akjòn tsjá-te ra a'ta 'tse jé-la xita naxindá. Tanga Jesús, 'kia nga kitsjà kjotjò ijo-la nga kiní'ken, ta india kjón-ní kitsjà skanda ta kjiá-nioo. ²⁸Jè kjotéxoma ra kitsjà Moisés, 'koaá 'sín tǐchja nga jǎà kítsajna na'mì ítjòn xita ra tsin-la nga'ño; tanga jè 'én ra xkón tǐjn ra askan kitsjà Nainá, 'koaá 'sín tǐchja nga jè 'ndí-la, na'mì ítjòn kǐjna, jè ra ko'sín kisikò nga nímé kichija'ta-la skanda ta kjiá-nioo.

Kó'sín jé Jesús tsikǐjna'ño jngo ra kjoa xitse

8 ¹Nga'tsi kjoa ra inchichibaya-ná, tǐjn jngo ra isa 'ño chjí-la, jè-ní nga tǐjnaá jngo-ná na'mì ítjòn ra ya tsikǐjna'ta nga kixi-la ya íxile-la Nainá jè ra tíbatéxoma ya ján ngajmi. ²Yaá síxá ya nándá tǐjna ra ngi Ni'ya Tsje-la Nainá ra jè sabà Nainá tsikínda, ko mì tsa xita tsikínda.

³Nga'tsi ra na'mì ítjòn 'koaá 'sín satéxoma-la nga kjotjò tsjá-la Nainá ko cho sí'ken, ko 'koaá 'sín ma-ni nga jè Cristo, tǐ'koaá machjeén-ní nga ki'se-te-la mé ra kitsjà-la Nainá. ⁴Jè Cristo, tsa íi-la tǐjna i a'ta nangi, skanda mí-la koma nga na'mì kǐjna, nga i a'ta nangi, ta 'koa tǐjn na'mì ra tsjá-la kjotjò Nainá koni 'sín tǐchja jè kjotéxoma ra tsikínda Moisés. ⁵Tanga jǎà na'mì ra tǐjn i a'ta nangi yaá síxá ya ni'ya ra ta isén-la ko jè ra ta 'ngièn-la jè Ni'ya Tsje-la Nainá ra tǐjna ya ján ngajmi; koni 'sín tsi'kìn-la Moisés, 'kia nga ijye mejèn kiì'tsia kjòn nga kiìnda jè ni'ya tsje-la Nainá ra 'tse nikje, 'kia nga kitsò-la: “Nda kjón tikítsjin koni 'ki ra ítsakon-la ya nindo Sinaí, 'koa kjón 'sín 'ki ra 'ki ra tinda jngi.” ⁶Tanga 'ndi-ni, isaá nda tǐjn jè xá ra itjábé-la Jesucristo nga na'mì ítjòn tǐjna, nga jè

basèn-jin-ná jngo kjoa xitse ra isa nda tjín ra tsikíndajín Nainá ko jñà xita, ta ngatjì-la nga yaá nchrabá'ta-ni 'én ra isa nda tjín koni 'sín ijye kitsjà tsa'ba Nainá.

Kó'sín nga jè kjoa ra isindajín ítjòn mì tsa ngi nda ki'se

⁷Tsa mí-la mé isijchija'ta-la jè kjoa ra isindajín ítjòn, mí-la tì machjeén-ni tsa ijngo 'ká sindajín india-ni. ⁸Tanga Nainá 'kia nga tsakátiko kitsò-la:

Kijchò nichjin 'kia nga ijngo kjoa xitse kindajín-koò jñà xita Israel ko xita Judá.

⁹Jè kjoa xitse ra kindajín-koò, mì tsa tì ko'sín sindajín-ni koni 'tse xita jchínga-la, 'kia nga 'an kjón ítساب'ño tsja nga ítsachrjékàjian ya nangi Egipto. Jñà xita kì, ta ngatjì-la nga mì isìhitjasòn jè kjoa ra ítsikíndajín-ko, 'koaá 'sín kjomà-ni nga kítsjin-tákon.

¹⁰'Kia nga ijye koto nichjin kì, jè kjoa xitse ra kindajín-ko jñà xita Israel, kí'sín tjín: Jñà kjotéxoma-na, yaá sikjáha'sen-jiaan ya ajin kjobítsjen-la,

ko yaá kindá'tá ya ajin inìma-la.

Ko 'aán koma jè Nainá-la ko jñà koma xita naxindá-na.

¹¹Mì kì tì kochjeén-ni nga xita xákjín kokòn-ya-la, nì jè 'ndse kokitso-la nga katabexkon-na nga 'an-ná ra Nainá;

nga nga'tsí xita skexkon-na, ma'tsia kjòn-ni ra ixti skanda jñà ra 'nó xita jchínga.

¹²'Aán sijchá'ta-la nga'tsi kjoa'cho ra ki'sín, ko nì-tì-kjiá síkítsjen-na jñà jé-la.

'Koaá xiaaṅ 'an ra Nainá.

¹³'Kia nga Nainá chja a'ta 'tse ra ijngo-isa kjoa xitse ra sindajín, kí ngatjì-la nga ijyeé kjójchínga jè ra isinda ítjòn; ko jè kjoa jchínga ra ijye tífehe'ta, ta chibaá nichjin chija-isa-la nga ngi jchija.

Kjoa xitse ra isa nda tjín ra tsikíndajín Nainá ko xita

9 ¹Jè kjoa ra tsikíndajín ítjòn Nainá ki'seé-la kjotéxoma kó'sín nga jeya síkijna Nainá, ko tì'koaá kisijnaá jngo-te

ni'ya tsje-là i a'ta nangi. ²Jè Ni'ya nikje ra Tsje ra 'tse Nainá, 'koaá 'sín tjínda nga tíjna ítjòn jngo-là i'nde ra 'mì I'nde Tsje ñánda tíjna jè kichá oro ra kìn chrjì tjín-là ra sincháya ni'í nga tì, kò jè ímixa ra sinchásòn niño nchrajín tsje-là Nainá. ³Ya ajton-là nikje ra tjo'bángi ra ma-ni jò, yaá kjijna jè i'nde ra 'mì I'nde ra Bato 'Ñó Tsje. ⁴Ya i'nde rakìi, yaá tíjna jngo kàxa ra ngi kichá sinè ra tìsòn chrjongó Nainá; kò tì'koaá yaá kjijna kàxa ra ngi kichá sinè ijàjno jè ra tjíya jñà tsajmì ra bakón kjoa ra tsikíndajín Nainá. Kàxa rakìi, yaá tíjnaya jngo tíjì ra ngi kichá sinè ñánda ijncha niño nchrajín ra 'mì maná; tì'koaá yaá kjinaya yá koròti-là Aarón ra tsikì'jtsén kò jñà najo te ra tíj'ta kjotéxoma-là Nainá ra itjábé-là Moisés. ⁵Ya asòn kàxa incha isén-là ìkjalì ra tjín-là najngá ra bakón chiya kjoajeya-là Nainá; jñà najngá-là yaá bíjtsa'ma jè kàxa; tanga 'ndì 'ndì, mì kì machjeén nga jndà jndà kinákjeé ra a'ta 'tse kjoa kìi.

⁶'Kia nga ijye kò'sín isinchanda tsajmì kìi, jñà na'mì kji'tá nìchjin 'faha'sen ya Ni'ya Tsje-là Nainá ra nikje, ya i'nde ra tíjna ítjòn nga síhitjasòn xá-là nga bexkón Nainá. ⁷Tanga jè i'nde ra bijchó jò-ni, ta jè tajngo na'mì ítjòn ma 'faha'sen, kò ta indiaá ma 'faha'sen nga jngó jngó nó; kò 'kia nga 'faha'sen, tíjnè-là nga jní-là cho 'ba ra tsjá-là Nainá ta ngatjì-là kjoa 'tse jé-là kò ta ngatjì-là nga'tsì jé ra tjín-là xita naxindá, jñà jé ra nda mí be kó'sín nga kàjin. ⁸'Koaá 'sín síchiya-ná jè Inìma Tsje-là Nainá, 'kia nga takó jè tímachjeén jè Ni'ya Tsje ra Nikje ra isinda ítjòn, kjè kì tjáxa'nde nga koma kitjáha'seén jè I'nde ra isa 'Ñó Tsje. ⁹Jñà kjoa ra kjomà kjotseé ta tsakón chiyaá jè kjoa ra tíma nìchjin 'ndì; nga jñà kjotjò kò jní-là 'cho ra ixaájten ya i'nde jè, tsìn-là nga'ño nga ngi india kjón sìtsje kjobítsjen-là xita, jñà ra kò'sín bexkón Nainá. ¹⁰Kjoa kìi, ta kjotéxoma ra a'ta 'tse ijo-là xita-ní, 'tseé tsajmì ra ma chine kò ra ma 'yò, kò kó'sín nga sítsje ijo-là xita; ta 'koaá 'sín tjen kochjeén skanda 'kia nga jè Nainá sìlkaatjìya-là nga'tsì kjoa kìi.

Kó'sín nga isaá 'ñó tjín-là nga'ño jè kjotjò-là Cristo

¹¹Tanga 'kia nga ijye 'ji jè Cristo ra na'mì ítjòn tíjna a'ta 'tse kjonda-là Nainá ra ijye tíma, yaá 'jaha'sen Ni'ya Tsje-là Nainá ra isa 'ñó nda chon kò ra isa kixì tjín nga mì tsa tsja xita isinda-ni, jè ra tsò-ni kjoa nga mì tsa i kisinda a'ta nangi.

¹² Jè Cristo ngi indiaá 'jaha'sen skanda ta kjiá-nioo ya I'nde Tsje; ko mì tsa tì jní-là tíndso ko jní-là nchraja isichjeén-ni nga ma 'jaha'sen; ngi 'tse kjón-ní jní ra isichjeén nga ma 'jaha'sen; 'koaá 'sín ki'sín nga tsikíchjítjì jé-ná mé-ni nga ma sùkítsajnandíí-ná ta mé nichjin-nioo. ¹³ Tsa jñá-la jní-là nchraja ko jní-là tíndso ko chijo-là nchraja chjoón i'ndí ra kitì, matsjesòn'nga-ni ijo-là xítà ra maxa'ya 'kia nga xaánten-jnó, ¹⁴ isaá ta tse nga'ño tjin-là jè jní-là Cristo. Nga ngi koó nga'ño-la Inìma Tsje ra tijnakon nda tà mé nichjin-nioo, nga kisìngatsja ijo-là Nainá koni jngo kjotjò ra nì ta mé jé tjin-là. Jé jní-là Cristo sùitsje-ni kjobítsjen-no nga kjoaáxìn-no jè kjoa'cho ra kjobiya kji'ta-là mé-ni nga ya sixá'ta-la Nainá ra tijnakon.

Kó'sín tjin jè kjoa xítse ra tsikíndajín Nainá ko xítà

¹⁵ 'Koaá ma-ni, nga jé Cristo ra basèn-jin masen 'kia nga sindajín jngo kjoa xítse; 'kia nga 'ken, jè tsikíchjítjì jé-la xítà ra tsakátsji 'kia nga tì'sa jè tíbatéxoma kjoa ra isindajín ítjòn, mé-ní nga jñá ra xá inakjoá-la, tjábé-la koni 'sín nga kitsjà-la tsa'ba Nainá jè kjotjò ra mì kì fehe'ta skanda ta kjiá-nioo. ¹⁶ 'Kia nga jngo xítà síka'bí tsajmì ra tjin-là, bínda jngo xajon ra bájna masen [ra 'mì testamento]. Tanga skanda 'kiaá ma machjeén xajon rakìi 'kia nga ijye biya jè xítà ra tsikínda. ¹⁷ Tanga jè xajon rakìi, mì kì mé chjì-la 'kia nga takó tijnakon-isa jè xítà ra tsikínda, skanda 'kiaá chjì-la, 'kia nga ijye kiyá. ¹⁸ Jè kjoa ra kisindajín ítjòn, 'koaá tì'sín ko kjoabiyaá kisindajín-te-ni nga jní-là cho kjochjeén. ¹⁹ Moisés, 'kia nga ijye tsi'kénajmíya nga'tsi kjotéxoma-la Nainá ya ajin-la xítà naxínda, iskábé jní-là tíndso ko jní-là nchraja i'ndí ko isíkójin nandá, ko iskábé tsja-la forrè ra inì kjòn ko jngo chrja-la yá ra 'mì hisopo; akjòn tsjahíjin ya jní, ko akjòn tsikíxten-jnó jè xajon ra tjí'ta kjotéxoma-la Nainá; ra ijye kjomá, tsikíxten-jnó-te nga'tsi jñá xítà naxínda. ²⁰ Jè Moisés kitsò: “Jè jní rakìi ra síkixiya kjoa ra tsikíndajín-ko-no Nainá, jè kjohixi ra kitsjà-no nga sùitjasòn.” ²¹ Moisés tì'koaá tsikíxten-jnó-te jní ya Ni'ya Tsje-la Nainá ra nikje ko nga'tsi tsajmì ra machjeén 'kia nga 'yaxkón. ²² Koni 'sín tíchja jè xajon ra tjí'ta kjotéxoma-la Nainá, kjameé nga'tsi tsajmì, saba jní matsje ijye-ni; tsa mì kì xaánten jní, tsìn ra 'mì kjoanìhijcha'ta ra a'ta 'tse jé. ²³ 'Koaá ma-ni nga tjinè-la nga jní-là cho kjotsje-ni jñá

tsajmì kii ra xkòsòn-là tsajmì ra tjín ya ján ngajmi; tanga jñá kjón-ní tsajmì ra tjín ya ján ngajmi, jé machjeén-là nga xaájten jní ra isa 'ñó nda tjín nga ma kotsje-ni.

Mé ngatji-là nga ko'sín kitsjà kjotjò ijo-là Cristo

²⁴Tanga jè Cristo mì tsa ya 'jaha'sen ya Ni'ya Nikje Tsje ra ta tsja xità isinda-ni ra ta xkòsòn-là Ni'ya Tsje-là Nainá ra kjiina ján ngajmi. Tanga ngi ya kjón 'jaha'sen ya ján ngajmi nga ijchò ya ngixkon Nainá nga tíchjatji-ná. ²⁵Mì kì tsa ko'sín kjìn 'ka 'jaha'sen ya ján ngajmi nga kjìn 'ka kitsjà kjotjò ijo-la, koni 'sín 'sín jngo na'mì ítjòn nga xkì nó 'faha'sen ya 'l'nde ra Bato 'Ñó Tsje nga 'faha'sen-ko jní ra mì tsa 'tse. ²⁶Tsa 'koaà-la 'sín tjínè-là nga ko'sín koma tsiki, jè Cristo, kjín-la 'ka tsatojin kjohi'in skanda 'kia-ni isinda isà'nde. Tanga 'ndi 'ndi, nga ijye tífehe'ta nichjin, ta india kjón-ní ko'sín kitsjà ijo-là skanda ta kjiá-nioo nga ko'sín jè saba jní-là tsikíxten mé-ni nga tsjahíxìn-ni kjoa 'tse jé. ²⁷Koaá 'sín tjín ra a'ta 'tse nga'tsi xità nga ta india kjón-ní biya, koaskaán kj'íi jè nichjin 'kia nga sindajín-là. ²⁸Koaá ti'sín tjín a'ta 'tse Cristo; ta indiaá kitsjà kjotjò ijo-là nga 'ken mé-ni nga kjìn xità itjahíxìn-là jé-là ra jè ki'tsamjìn; tanga ra kijchò-ni jò 'ka, mì tsa ti jé 'koamjìn-ni; kíí xá kj'íi-ni nga kochrjekàjin kjohi'in jñà ra inchikoñá-là.

Kó'sín nga mì kì ti machjeén-ni kjotéxoma ra isindajín ítjòn

10 ¹Jè kjotéxoma-là Nainá ra itjábé-là Moisés, mì tsa ngi jè kjòn-ni jè kjonda ra askan tjínè-là nga 'ji; koni ta tjen tsakón itsé jè 'ngién-là. 'Koaá ma-ni nga jè kjotéxoma níkjíá koma ngi tsje sikkítsahijyo jñà xità ra xkì nó xkì nó síchraña'ta-là Nainá nga tjíñà tjíñà kjotjò tsjá-ni nga xkì nó. ²Tsa india kjón-la jè kjotéxoma sítsje jñà jé-là xità, mí-la ti kì jñà sijin-ni kjobítsjen-là nga jé tjín-là, ko mí-la ti jní-là cho tsjá kjotjò-ni. ³Tanga jè jní-là cho, xkì nó xkì nó síkítsjen-yá-là jè jé ra tjín-là xità. ⁴Nga jè jní-là nchrajá ko jè jní-là tíndsó mì kì ma-là faháxìn jñà jé-là xità.

Kó'sín chjí-là jè kjobiya-là Cristo

⁵'Kia nga 'ji Cristo i isà'nde, kitsò-là Nainá:
Majìn-li jní-là cho ra biya, ko kjotjò ra tsjá-li xità,
tanga jé ijo-na iníkjñandi.

⁶ Mì kì sasén-li nga chò tì-li,

kò nìjñà k̄jotjò ra tsjá-li ra a'ta 'tse jé-la x̄ita.


⁷ 'Kiaá kichjà nga kixin-la: “Koni 'sín tichjā xajon-li ra a'ta tsa'an,

íí tijnā nga s̄ihitjásòn koni 'sín mejèn-li jì ra Nainá 'mì-li.”

⁸ Jè Cristo, k̄í 'sín kitsò nga ítjòn: “Mì kì kjomejèn-li t̄i'koa mì kì kisasén-li jnì-la chò ra biya kò k̄jotjò ra tsjá-li x̄ita, kò chò ra baká-li x̄ita kò k̄jotjò ra tsjá-li ra a'ta 'tse jé-la”, n̄i'sín takó kò'sín tichjā k̄jotéxoma nga t̄jíné-la nga kotjín ra tsjá x̄ita. ⁹ Akjòn kitsò-isa: “Íí tijnā ijnd̄í mé-ni nga s̄ihitjásòn-na koni 'sín mejèn-li.” Kíí tsò-ni jñà 'én k̄íí nga jè Cristo tsjahixìn jè kjoā ra tijnā ítjòn mé-ni nga kisíkjina-ni jè kjoā ra x̄itse.

¹⁰ 'Koaá 'sín kjomà-ni nga isitsje inìma-ná Nainá a'ta 'tse Nā'ín-ná Jesucristo 'kia nga is̄ihitjasòn koni 'sín kjomejèn-la Nainá nga ta india kjón-ní kitsjà ijo-la skanda ta kjiá-nioo koni jngo k̄jotjò 'kia nga 'ken.

¹¹ Nga'tsì nā'mì, n̄ichjìn nchijòn in̄chis̄ihitjasòn xá-la nga 'ñó kjìn 'k̄a t̄ijè t̄ijè k̄jotjò síngatsja-ni Nainá, jñà k̄jotjò ra n̄ikjia ma-la faháxìn jé-la x̄ita. ¹² Tanga jè Jesucristo, ta jngo 'ká kjón-ní kitsjà k̄jotjò ijo-la skanda ta kjiá-nioo ra ta ngatjì-la kjoā 'tse jé; ra ijye kjomà, akjòn yaá tsikijna'ta ya nga kixi-la Nainá. ¹³ Yaá tíkoñá skanda 'kia nga jñà x̄ita kondra-la s̄ijchija nga jè Nainá s̄ik̄ijyongí ya ndsako. ¹⁴ Nga ta india kjón-ní kitsjà k̄jotjò ijo-la mé-ni nga ngi nda kjòkixiya-ni skanda ta kjiá-nioo jñà x̄ita ra in̄chimatsje. ¹⁵ Jè Inìma Tsje-la Nainá ndaá síkixiya-ná 'kia nga kitsò ítjòn:



I'nde n̄anda nga síngatsja Nainá jñà k̄jotjò-la x̄ita

¹⁶ Jè kjoa rakìi ra kindájín-ko jñà xita
'kia nga koma askan-nioo, tsò Na'in-ná:
Jñà kjotéxoma-na, yaá kindá'tá inìma-la,
ko yaá kijiáan ya ajin kjobítsjen-la.

¹⁷ Ko tsò-isa:

Ni-ti-kjiá síkítsjen-yá india-na jñà jé-la,
ko nga'tsì kjoa'cho ra ki'sìn.

¹⁸ 'Kia nga ijye inihijcha'ta-ná jé-ná mì kì tì machjeén-ni nga
jní xaájten ra kjoa 'tse jé.

Kó'sín nga maá nda jchibá-ná ko Nainá ra a'ta 'tse Cristo

¹⁹ 'Koaá ma-ni jìon ndí 'ndsé, ta ngatji-la jní ra tsikíxten
Jesús, tjí'nde-ná nga ma kitjáha'seén ya I'nde ra Bato 'Ñó
Tsje ya ñándá nga tíjna Nainá. ²⁰ Nga jè iskí'xa jngo-ná
ndiyá xitse ra fiko-ná ñándá nga kitsajnakeen mé-ni nga
koma kitjáha'seén ya ñándá nga tja'bájto jè nikje ra tja'báya
masen-la jè I'nde Tsje-la Nainá; nga jè nikje, jé ngoya-la ijo-la
Jesús. ²¹ Nga tíjnaá jngo-ná na'mì ra 'ño jeya tíjna ra batéxoma
ya ni'ya-la Nainá. ²² 'Koaá ma-ni nga machjeén-ní nga ngi koó
inìma-ná sichraña'ta-lá Nainá nga ngi tíngo takén ra a'ta
'tse, 'kia nga ijye kjotsje inìma-ná nga'tsì ra kjobítsjen 'cho
ko ngi nandá tsje ra kisiníjno-ni ijo-ná. ²³ Kixi kitsajnakéé
kjoa ra inchichiñá-lá koni 'sín nga bixé nga makjiín-ná, nga
mì kohíkojno kohíko'té kjobítsjen-ná; nga Nainá, xita kixi-ní,
sihitjasòn koni 'sín ijye kitsjá-ná 'én-la. ²⁴ Kjótsji'nde-lá kó'sín
nga kisikeé jñà xàngieé mé-ni nga isa nda 'se-ná kjotsjacha
ko mé-ni nga koma ko'sín 'sieén jñà kjoa ra nda tíjn. ²⁵ Mì kì
kijmié koni 'sín nga 'fiheé ya ñándá nga maxkóyeé koni 'sín
'sín i'ka jñà xita ra ijye ko'sín nga-la; ta isaá machjeén-ní nga
'kì nga'ño-lá jñà xàngieé nga jngó jngó-ná, ko isaá 'kia nga
ijyeé tí'ya-la nga tímachraña jè nichjin-la Nainá.

²⁶ Nga tsa xá tíjn-ni takén nga kjótsji-jé iseé, 'kia nga ijye
ka'yaxkeén ra kjoakixi 'tse Nainá, mì kì tì mé jní ra ma
xaájten-ni ra kjoahíxìn india-ni jé-ná. ²⁷ Ta jé chiñá-isa-lá
nga koko-ná kjohi'in ra 'ño i'in tíjn ko jè ni'í ra sítì síjnga
tíma ñándá nga jti jñà xita ra kondra fi-la Nainá. ²⁸ Jè ra
batonè-la jè kjotéxoma ra itjábé-la Moisés, tsa jò ko tsa jàn
xita tsjá 'én nga kijtse nga kixí kjoa, mì kì mahimacha-jìn,
ta ndi'toón ni'ken. ²⁹ Kó'sín be-la takòn jìon, ¿a mí tsa isa tse

kjohi'in bakén-la jñà xitá ra minchanè jè l'ndí-la Nainá ko bachrjengi jè jní ra tsikíxten, ko tì'koa chjajno-la jè Inìma Tsje-la Nainá ra tsjá-ná kjonda? Jè jní ra bachrjengi, jè-ní ra Nainá isichjeén nga tsikíndajín-ko xitá jngo kjoa ra xitse, ko ra kjomà kjotsje-ni inìma-la xitá kù. ³⁰ Ijyeé tjíjin-ná nga ijyeé kokitsò Nainá: "Aán bako-na nga tsja-la kjohi'in xitá, 'aán tsja-la chjí-la." Ko india-isa tsò: "Jé Nainá kùindajín-la jñà xitá naxindá-la." ³¹ Taxki 'ñó tse kjojkón tjín-ni 'kia nga ya kayeé tsja Nainá ra tijnakon!

³² Tanga tikítsjen kó'sín kjomà'tioòn nìchjin ra ijye tsatò 'kia nga tì'sa ina'yá ítjòn kjòn jè 'én kixi ra isìhsen-no nga ichikjoa-no nga tse kjohi'in inikjioón. ³³ Ijchó nìchjin nga jñà xitá kùichjajnoó-no ko iskajàn-ko-no ya ngixkon xitá naxindá. Skanda tì'koaá ijchò jngo-te nìchjin nga inìngásòn-koò-te jìòn jñà ra 'koa tì'sín inchisíkjiín-te kjohi'in. ³⁴ Jìòn, kjòhimacha-no jñà xitá ra kjohi'in isìkjiín jñà ra tsikítsa'ya ndayá; tì'koaá mì tsa kjojtì-no 'kia nga itja'án-no jñà tsajmì-no; ta isaá tsjaá k'ise jnchro-no ta ngatjì-la nga ijyeé 'ya nga ya ján ngajmi tjín-no tsajmì ra isa 'ñó nda ko ra mì kì fehe'ta nì ta kjia-nioo. ³⁵ Kì jmio koni 'sín nga kji'ta takòn Nainá, nga yaá 'ya kjotjò ra 'ñó tse chjí-la. ³⁶ Machjeén-ní katachíkjoako-no kjohi'in, mé-ni 'kia nga ijye kitjasòn-no koni 'sín mejèn-la Nainá, tjábé-no jè ra tsjá Nainá koni 'sín nga ijye kitsjà tsa'ba. ³⁷ Nga 'koaá 'sín tíchja xajon ra tjí'ta 'én-la Nainá nga tsò:

Kj'íí ndìton ndìtoón-ní
jè ra tjínè-la nga nchrabá.
Mì kì tì tse kichjin-ila.

³⁸ Jè ra xitá kixi,
jè kíjnakon-ni nga makjiín-la a'ta 'tse Nainá.
Tanga tsa í'tsin kiji-ní,
mì kì sasén-la inìma-na.

³⁹ Jién, mì tsa í'ndsién mangí-né koni 'sín 'sín jñà xitá ra í'tsin fì-ni nga síjchija ijo-la. Ta isaá jnchro jién, nda makjiín-ná mé-ni nga mì jchija-ni inìma-ná.

Kó'sín tjín kjòn-ni kjoa ra makjiín-ná

11 ¹ Jè kjoa ra makjiín-ná, jé-ní nga tjín kixi-ná nga tjábé-ná jñà kjoa ra chiñá-lá; jè-ní nga tjíngoó takén nga tjín kitií jñà kjoa ra takó kjè kì tsijen-la xkén. ² Ta ngatjì-la

nga ndaá kjokjiín-la jñà xit̃a jchínga ra ki'se kjotseé, ndaá kina'yà-la ra a'ta 'tse.

³Ki-ní nga makjiín-ná, nga ko'sín machiya-ná nga jè Nainá, ngi tà 'én tsikínda-ni jè isà'nde nga isikatsjén tsajmì ra mì kì tsijen-ni nga tì'sa ítjòn.

⁴Jè xit̃a ra ki'mì Abel, ta ki-ní nga kjokjiín-la nga ko'sín isa nda kjon kjotjò ra kitsjà a'ta 'tse Nainá, ko mì 'koa-ni koni jñà 'tse Caín. 'Koaá 'sín kjomà-ni nga Nainá nda kisasèn-la jè kjotjò ra kitsjà-la ko xit̃a kixi kitsò-la. Ni'sín ijye 'ken, skanda nichjin 'ndi 'ndi, takó 'koaá 'sín tíchja koni 'sín nga kjokjiín-la.

⁵Jè xit̃a ra ki'mì Enoc, ta ki-ní nga kjokjiín-la, nga ko'sín kiiko tíkon Nainá ya ján ngajmi, ko mì tsa kjobiya kijtse, ko mì tì kì isakò-ni ta ngatjì-la nga ijyeé kiiko Nainá. Ko 'kia nga tikje fiko, 'koaá 'sín na'yá-la nga nda-ró kisasèn-la Nainá koni 'sín nga ki'sín. ⁶Tanga tsa mì kì makjiín-ná, mì kì koma kitjasòn-ná kjoa ra sasèn-la Nainá. Nga jè xit̃a ra mejèn-la nga chraña kíjna-la Nainá, machjeén-ní nga nda katakjiín-la nga tíjnaa ra 'mì Nainá; tì'koaá katakjiín-la nga jè-ní ra síngatsja kjonda jñà xit̃a ra bátsji.

⁷Jè xit̃a ra ki'mì Noé, 'kia nga tsi'kénajmí-la Nainá kjoa ra kokama askan-nioo ra takó kjè kì 'ya-la, kií-ní nga kjokjiín-la nga ngi koó kjoskon-la tsikínda jngo chitso ra 'ño jè 'ki, mé-ni nga kjomà tsatojin-ni kjojkón nga mì kì 'ken nga'tsì xit̃a ra tíhijyo ya ni'ya-la. Noé, ta ngatjì-la nga nda kjokjiín-la ra jè, 'koaá 'sín isinè-la kjohi'in nga'tsì xit̃a isà'nde, ko jè Noé ítjábé-la kjotjò ra tsjá Nainá nga xit̃a kixi kjomà ya ngixkon, ta ngatjì-la nga kjokjiín-la.

⁸Jè xit̃a ra ki'mì Abraham, 'kia nga kiichja-la Nainá, kií-ní nga kjokjiín-la nga isihitjasòn ko itjojiín ya nangi-la nga kiji skanda ya i'nde ñánda nga tà kjotjò tsjá-la Nainá. Kijí-ní ni'sín mì kì be ñánda nga tífi. ⁹Tà ngatjì-la nga kjokjiín-la, yaá isíjchá ijo-la koni xit̃a xìn nangi ya i'nde ñánda nga ko'sín kitsò-la Nainá nga tsjá kjotjò-la. Ni'ya nikjeé tsikitsajmaya; 'koaá tì'sín tsikitsajna Isaac ko Jacob, ra tì'koa tì'sín tsi'kin-te-la nga tjábé kjotjò-te-la jè nangi. ¹⁰Nga jè Abraham, jè tíkoñá-la jngo naxindá ra ijye 'ño nda tjín-la nga'ño kó'sín nga tíjna tjà'tsin chrjó-la, ra jè Nainá iskosòn-la kó'sín nga sinda, ko tijé-ni Nainá ra tsikínda.

¹¹ Ti'koaá ta kií-ní nga nda kjokjiín-là Abraham nga ki'se-là nga'nó ni'sín ijye 'nó xita jchínga, kjamà isakò jngo-là i'ndí jè ndí chjoón-là ra 'mì Sara ni'sín chjoón 'ndí, nga kjokjiín-là nga Nainá síhitjasón-ní koni 'sín nga kitsjà kixi-là tsa'ba. ¹² Koáá ma-ni nga ta ya tajngoó a'ta 'tse xita rakii inchrabà-ni tje-là nga kjin jchán ixti ki'se-là ni'sín ijye 'nó xita jchínga nga tifehe'ta nichjin-là. 'Koaá 'sín kjin jchán ma-ni ixti-là koni jñà nitse ra tjín ya ján ngajmi kò koni jñà chrjo ra tjín ya andi ndáchikon ra mì kì ma maxkiya.

¹³ Nga'tsi jñà xita kii, 'koaá 'sín makjiín-là skanda nga 'ken, ni'sín mì kì itjábé-là jè ra ijye Nainá kò'sín kitsjà-là tsa'ba nga tsjá-là; tanga ta 'koaá 'sín kjòchiya-là koni tsa ta kjiín kijtse-ni, kò tsjaá ki'se-là, kò 'koaá 'sín kitsò nga mì tsa i i'nde-là nga ta asa inchi'fahato i a'ta nangi. ¹⁴ Jñà xita ra kò'sín tsò, 'koaá 'sín 'benajmíya kixi-ná nga 'saá inchibátsji jngo nangi ra ngi 'tse kitsò-là. ¹⁵ Tsa jé-la inchisíkijsen jè nangi ya nándà nga itjokàjin-ni, mí-la kì mé chjá kjomà-là tsa tsáfa india-ni nga kiji-ni ya nándà nga itjokàjin. ¹⁶ Tanga jè inchibátsji jngo nangi ra isa nda chon, jè ra ján ngajmi tíjna. 'Koaá ma-ni nga Nainá mì kì masabà-là nga Nainá 'tse tsò-là; kò ijyee isíkijnanda jngo-là i'nde nándà nga naxindá-là koma nga ya kítsajna.

¹⁷ Jè Abraham, 'kia nga itjá'ta a'ta 'tse Nainá, ta kií-ní nga makjiín-là nga iskábé jè Isaac nga tsjá-là Nainá koni jngo kjotjò, kò tsikijnanda-ní nga tsjá i'ndí-là ra tà jè tajngo ma-ni, ni'sín xá kò'sín kitsjà-ni 'én-là Nainá a'ta 'tse i'ndí-là, 'kia nga kitsò: ¹⁸ “A'ta 'tsee Isaac, nga kjin jchán koma tje-li.” ¹⁹ Abraham, 'koaá 'sín kjòchiya-là nga jè Nainá tjín-là nga'nó nga ma-là sìkjaáya-là xita ni'sín ijye 'ken. 'Koaá ma-ni nga itjábé india-ila jè i'ndí-là koni tsa jaáya-ila ra a'ta 'tse kjobiya.

²⁰ Jè Isaac, kií-ní nga makjiín-là nga isjé-là Nainá nga katasíchikon'tin jè Jacob kò jè Esau a'ta 'tse kjoa ra kokama'tin askan-nioo. ²¹ Jè Jacob, 'kia nga ijye mejèn tíbiya, kií-ní nga makjiín-là nga isjé-là Nainá nga katasíchikon'tin ngajò ixti-là José; síngi'nókòd-ni yá koròti-là, jeya isíkijna Nainá. ²² Jè José, 'kia nga ijye mejèn tíbiya, kií-ní nga makjiín-là nga tsi'kénajmí-ni kó'sín koma jñà xita Israel nga kitjokajin ya naxindá Egipto. Ti'koaá kitsjà kjohixi ra a'ta 'tse ninda-là kó'sín siko.

²³ Jñà x̄it̄a jchínga-l̄a Moisés, kií-ní nga kjokjiín-l̄a nga ján sá isikíjna'ma i'ndí-xó-l̄a 'kīa nga t̄i'sa kitsin, nga kijtse-ní nga 'ñó nda 'ki, k̄o mì k̄i itsakjòn-l̄a kjotéxoma-l̄a x̄it̄axá 'tse nax̄indá Egipto. ²⁴ 'Kīa nga ijye kjójchínga Moisés, ta kií-ní nga kjokjiín-l̄a nga mì k̄i tsa n̄a-l̄a kitsò-l̄a jè tsati-l̄a Faraón. ²⁵ Tà isaá jè kjomejèn-l̄a nga kjohi'in isikjiín k̄o jè nax̄indá-l̄a Nainá, k̄o mì tsa jè kjomejèn-l̄a nga kjotsja tsjá-l̄a ijo-l̄a ra kjoa 'tse jé. ²⁶ 'Koaá 'sín kiskosòn-l̄a nga isaá 'ñó chj̄i-l̄a kjohi'in ra siikjiín a'ta 'tse Cristo [ra xá isikasén-ni Nainá] k̄o nda mí 'koa-ni nga kjotsja tsjá-l̄a ijo-l̄a ya a'ta 'tse kjoanchiná 'tse nax̄indá Egipto. Jè iskoñá-l̄a kjot̄jò ra askan tsjá-l̄a Nainá. ²⁷ Kií-ní nga t̄i'koa nda kjokjiín-l̄a nga itjokàjin ya nax̄indá Egipto; mì k̄i itsakjòn-l̄a jè kjoiti-l̄a x̄it̄axá ítjòn; 'ñó tsi'ké-l̄a ikon koni tsa t̄ikotsijen kjòn-l̄a jè Nainá ra kjè k̄i yá ra be.

²⁸ Jè Moisés, kií-ní nga nda kjokjiín-l̄a, nga tsachrje 'sí paxko. K̄o 'koaá 'sín kitsò-l̄a nga'tsi x̄it̄a Israel nga jní siikajàjno ya xotjoba ni'ya-l̄a, mé-ni nga jè ikjali-l̄a Nainá mì k̄i siik̄en nga jngó jngó ixti-tjòn-l̄a x̄it̄a kīi. ²⁹ Jñà x̄it̄a Israel, kií-ní nga kjokjiín-l̄a nga ma tsatojin jè ra 'mì Ndáchikon Inì koni tsa nangi kixì. 'Kīa nga kjomejèn-l̄a nga t̄i'koa t̄i'sín tsatojin jñà x̄it̄a Egipto, yaá 'ken-jin nandá nga'tsiòo.

³⁰ Kií-ní nga kjokjiín-l̄a jñà x̄it̄a Israel nga ixojen jñà chrjò ra tj̄indi-l̄a nax̄indá Jericó, 'kīa nga ijye kjo ito nichjin inchib̄it̄j̄indi-l̄a. ³¹ Kií-ní nga kjokjiín-l̄a jè chjoón ra ki'mì Rahab ra chjoón chijngi nga mì k̄i ya 'ken-k̄o jñà x̄it̄a ra mì k̄i makjiín-l̄a, nga jè chjoón rak̄i, ndaá kijtsetjò jñà x̄it̄a Israel ra ta ijchò katsijen 'ma ítjòn-l̄a ya nangi rak̄i.

³² ¿Mé kjoa ra ta 'kenájmí-isa? Mì k̄i kichóya-l̄a nichjin nga kichj̄a ra a'ta 'tse Gedeón, ra a'ta 'tse Barac, ra a'ta 'tse Sansón, ra a'ta 'tse Jefté, ra a'ta 'tse David, ra a'ta 'tse Samuel k̄o ra a'ta 'tse nga'tsi x̄it̄a ra isichjeén Nainá nga kiichja ngajo-l̄a. ³³ Jñà x̄it̄a kīi, kií-ní nga kjokjiín-l̄a, nga ki'seé i'ka ra isikijne-l̄a nga iskajàn-k̄o nax̄indá ra i'i; ki'seé i'ka ra kixí tsikíndajín kjoa; ki'seé i'ka ra itjábé-l̄a ra Nainá ijye k̄o'sín kitsjà-l̄a tsa'ba nga tsjá-l̄a; k̄o ki'seé i'ka ra tsikíchj̄ajto tsa'ba xa. ³⁴ K̄o ki'seé i'ka ra ma-l̄a isikji'tso ni'í ra bato 'ñó tsjè, ra ma jahachinga 'kīa nga ijye kjame k̄ich̄a ndajò t̄inì'ken-ni, ra ki'se india-il̄a nga'ñó 'kīa nga kjòhinda, ra 'ñó ki'se-l̄a nga'ñó kjoa 'tse kjojchán, ra isikijne-l̄a x̄it̄a kjojchán ra iskajàn-k̄o ra

kondra 'tse. ³⁵Ki'se íchjín ra itjábé india-ila xita xákjén ra ijye 'ken, 'kia nga jaáya-ila a'ta 'tse kjobiya.

Tanga ti'koaá ki'se i'ka xita ra ya 'ken-jín ya kjobi'in; mi kì kjomejèn-la nga tsikìtsajnandí-ni; jè ra kjomejèn-la nga isa ndaá kítsajna 'kia nga kjoaáya-la. ³⁶Tjín i'ka ra isikjín kjobi'in nga isìtsja'tin xita, nga iskajàn-ko, skanda na'nó kichá cadena isi'tá'nó ya aya ndayá. ³⁷Tjín ra najo isinè nga ini'ken; tjín ra serrúcho ngi inìjòya-ni; tjín ra kichá ndajò 'ken-ni. Ko tjín ra jndíi ra ján tsikima, nga ta chrjaba-la forrè ko tà chrjaba-la tíndsó tsakjaya. Tsee kjohimá ko tsee kjobi'in kisikjín ko 'nó ki'yaton. ³⁸Jñá xita kii, [ta ngatji-la nga 'nó nda kjokjín-la a'ta 'tse Nainá] skanda mí kì tsakin-la nga tsikitsajna i isà'nde. Nga jndíi ra ján tsinchimasòn ya i'nde kixi ñánda nímé tjín, ko ya asòn nindo; ko ya ñánda ngijo chon ko ya aya ngajo ra tjín ya ajin nangi. ³⁹Nga'tsi xita kii, ta ki-ní nga nda kjokjín-la nga nda ki'yaxkon-la tanga nijngo ra itjábé-la ra Nainá ijye kitsjà tsa'ba nga tsjá-la. ⁴⁰Tanga jè Nainá tsikínda jngo-ná kjoa ra isa nda tjín, mé-ni nga jñá xita kii, ta ngásòn kjòn koma-ná nga mi mé jchija'ta-ná nga xita kixi komeé.

Nda chítsijen-la Jesús

12 ¹Kia nga ko'sín ta 'nó kjín ma-ni xita ra títsajnandí-ná ra nda kjokjín-la, 'koaá ma-ni nga jién, machjeén-ní nga kijmié nga'tsi kjoa ra batéchjá-ná ko kjoa 'tse jé ra tsabá'nó-ná nga kondacha-ná; kínè-lá ijo-ná nga nda kjòn kichikeén nga katachíkjoako-ná skanda nga kijcheé ñánda nga tjínè kjòn-la nga kijcheé. ²Ngi tà jé kí'té xkén Jesús, jè ra tsikí'tsia kjòn-ni koni 'sín nga makjín-ná, ko jè ra síjngo kjoa makjín-ná. Ta ngatji-la jè kjotsja ra iskoñá-la kichíkjoakoó-la nga isikjín kjobi'in ya a'ta krò, ko mi tsa jè ki'sín kindá jè kjosabà ra ya isakò-la, ko 'ndi-ni yaá tíjna'ta nga kixi-la Nainá nga tíbatéxoma.

³Tikítsjen a'ta 'tse Jesús nga ichikjoakoó-la jñá kjobi'in ra jñá xita jé kitsjà-la, mé-ni nga mi kijta-no ko mi kì sikjahajen-la takòn. ⁴Nga jè kjoa 'tse jé ra inchibixkàn-ko jìòn, takó kjè tsa yá ra sí'ken kjòn-najìòn. ⁵¿A ijyee inijchajin jìòn jè 'én ra kitsjà-no Nainá nga ixti-la tsò-no? Nga tsò 'én ra tjí'ta xajon-la Nainá:

Ji ra i'ndí-na xin-la,

kì nachrjengi-jìn 'kia nga síkixiya-li Na'ín-ná,
kò kì níkjahajen-la takìn 'kia nga jè síkjaká-li.

⁶ Nga jé Na'ín-ná síkixiya-ní xita ra tsjake,
kò tsjá-la kjohi'in 'kia nga 'cho 'sín
nga'tsi xita ra kjábétjò nga i'ndí-la tsò-la.

⁷ Katchíkoako-no koni 'sín Nainá síkixiya-no, nga Nainá,
'koaá 'sín síko ra ixti-la tsò-la. Nga nga'tsi ra Na'in 'mì,
síkiyaá ixti-la. ⁸ Tanga tsa mì kì síkixiya-no Nainá koni 'sín
síko nga'tsi ra ixti-la ma, mì tsa ixti-la Nainá ma jìòn. ⁹ Jién,
'kia nga ti'sa ixti kjòn iseé, jñà xita jchínga-ná i a'ta nangi,
'koaá 'sín isikixiya-ná kò ndaá kijchaxkén. ¿A mí tsa isa nda
jchaxkón jnchro iseé Na'ín-ná ra tíjna ya ján ngajmi, mé-ni
nga kata'se-ná kjobinachon? ¹⁰ Kixíi kjoa, jñà xita jchínga-ná,
'koaá 'ki isikixiya-ná koni 'ki kjòchiya-la ra jñà, ni'sín ta tsato
jè nichjin ra ki. Tanga kjonda tsajién-né 'kia nga jè Nainá
kò'sín síkixiya-ná mé-ni nga tsje koma-ná koni 'sín nga tsje ra
jè. ¹¹ Kixíi kjoa, mì kì tsa tsja 'se-ná 'kia nga ti'sa níkiya-ná,
ta isaá jnchro ba 'se-ná; tanga ra ma askan-nioo tsa nda
kokixiyéé, 'nchán kitsajnéé kò kixíi sijché ijo-ná.

Kó'sín nga chjimitjèen ijo-ná

¹² 'Koaá ma-ni nga 'ti nga'ño-la ijo-no, chjimitjèen ndsaà ra
ijye tífe nga'ño-la kò jè ndáxkó-no ra ijye kjotsakon-la; ¹³ ndiyá
kixi tangió mé-ni nga konda-ni ndsakò ra ijye kjotsakon-la kò
mé-ni mì ya 'tóxkon-ni.

Kó'sín mì kì machjéén nga kìncha'taxín-lá kjonda-la Nainá

¹⁴ Kò'sín 'nchán titsajnakoo nga'tsi xita, kò tsje tikijna
inìma-no; nga nijngo ra ske Na'ín-ná tsa mì tsje tíjna
inìma-la. ¹⁵ Nda tikondaa ijo-no, kì niyá ra síjchija kjonda-la
Nainá, mé-ni nga mì ya kjinchrabà-ni kjosi nga tsjá
'chín-no koni tsa jngo xka ra tsja kjama-la. ¹⁶ Kì nijngo ra
xita chijngi ma, kì nachrjengio Nainá; kì tà chjàn kò'sín
'nià koni 'sín ki'sín jè Esaú nga tà jngo chroba tsajmì ra
ma chine tsatína-ni jè tsajmì ra tjínè-la nga jè kòko-la
koni nga i'ndí-tjòn. ¹⁷ Jiòn, tjíjín-no koni 'sín kjomà
'kia nga askan-nioo, jè Esaú, 'kia nga kjomejèn-la nga
katasíchikon'tin jè na'in-la, inachrjengi-ní; mì kì ti kjomà

jahatjìya-ni nga jè kjòchikon'tin india-ni, ni'sín takó 'ñó iskindaya.

¹⁸Mi tsa ya ijchòkincha'ta-la jìòn jè nindo chrjangi ra ma chaájno, [koni tjín kjojkón ra kijtse xita Israel] ya nándá nga títi jnga jnga ni'l, nga kjòjñò, isincha nitjen nitjen ifi jmà kò 'tsa tjo xkón, ¹⁹nga jane chrjoo, kò kina'yá-la jè jta-la Nainá 'kia nga kiichja. Tanga jñà xita ra kií'nchré-la tsikítsa'ba-ní nga kì tì tsja chja-isa-ni, ²⁰ta ngatjì-la mì tì kì ichikjoa-la koni 'sín tjín kjotéxoma ra isinè-la nga tsi'kìn-la: “Ta yá xita-ni, kò ni'sín tsa jngo cho, kosèn jngo ndsako ya nindo chrjangi rakii, tjíné-la nga najo kiyá-ni, kò tsa majìn kichaá tjáhi'sen-kjá-la.” ²¹Taxki 'ñó xkón tjín kjoa ra kijcha-la, skanda jè Moisés kitsó-ní: “Taxki 'ñó títsakjoo kò skanda tífatsé-náa.”

²²Tanga ra jìòn, yaá ijchò kincha'ta-la jè nindo chrjangi ra 'mì Sión, jè ra naxindá-la Nainá ra tíjnakon, jè naxindá Jerusalén ra tíjna ya ján ngajmi, nándá nga kjìn jmi ma-ni ìkjalì títsajna nga inchisítsjako Nainá, ²³kò nándá nga títsajnajtín ixti-la Nainá ra tjábé-la jè kjotjò ra bako-la ra ixtitjòn ra ijye ya incha 'í-la ya ján ngajmi; kò yaá ijchò-te jìòn ya nándá nga tíjna Nainá ra xitaxá tíjna nga bíndajín-la nga'tsi xita. Kò tì'koaá yaá ijchò kincha'ta-la jìòn jñà inìma-la xita kixi ra ijye Nainá kisítsje nga nímé chija'ta-la. ²⁴Kò yaá ijchò kincha'ta-te-la jìòn jè Jesús ra basèn-jin-ná jè kjoa xitse ra Nainá tsikíndajín kò jñà xita, kò yaá ijchò kincha'ta-te-la jìòn jè jní-la ra isaájten [nga isítsje-ná], jè jní ra isa nda chja-ná mì 'koa-ni koni jè jní-la Abel.

²⁵Nda tìkindaa ijo-no; kì tà chjàn nachrjengio jè ra tíchja-no. Nga jñà xita ra tsachrjengi koni 'sín inakjoá-la i a'ta nangi, 'kia nga inikjaká-la, mì kì 'jahajno-la ra a'ta 'tse kjohi'in ra ki'tsi-la. Tì'koaá ra jién, isaá ta 'ñó chjá tjín-ni nga kjoaájno-ná a'ta 'tse kjohi'in, tsa kináchrjengieé jè Nainá ra chja-ná skanda ya ján ngajmi nga síkjaká-ná. ²⁶Jè nichjin rakìò, jè jta-la Nainá, skanda isijtiyaá-la jè nangi, tanga 'ndi-ni, 'koaá 'sín kitsjà 'én-la nga tsò: “Íjngo 'ká sijtíya-isa-la, tanga mì tsa tà jè nangi ra sijtíya-la, skanda koó ngajmi sijtíya-la.” ²⁷'Kia nga ko'sín tsò nga íjngo 'ká sijtíya-isa-la, 'koaá 'sín machiya-ná nga tjáhixìn jñà tsajmì ra xá isinda-ni ra ma majtiya-la, mé-ni nga ta jñà síhijyo-ni jñà tsajmì ra mì kì ma majtiya-la. ²⁸'Koaá ma-ni nga mì kì ma majtiya-la jè i'nde ra títsjá-ná Nainá ya

ñándā nga kotexomakeé. 'Ki-lá kjonda kō ngi tà jé kjó'ta ikeén nga kiskón-cheé kō nga jchaxkén koni 'sín nga sasén-lā ra jè. ²⁹Nga “jè Nainá-ná, 'koaá 'sín jngoya-lā koni jngo ni'í ra baká tsjé tsje mé ra tjín.”

Mé kjoa ra machjeén nga 'siin jñā ra xīta-lā Cristo

13 ¹Kì tà chjàn jmio koni 'sín nga tsjacha xàngioo ra a'ta 'tse Cristo makjiín-no. ²Kì tà chjàn niijchaàjion koni 'sín nga chjíbétjò xīta ra bijchójkon-no. Nga jñā xīta ra ko'sín ma-lā kjábétjò xīta, skanda tjín i'ka ra mì be-ni tsa ikjali-lā Nainá-ní ra ko'sín iskábétjò.

³Tikítsjen a'ta 'tse jñā xīta ra ndayá títsajna, koni tsa ya titsajna-ko-te aya ndayá. Kō tikítsjen-te a'ta 'tse xīta ra inchi'yaton koni tsa jìon kjòn-ni ra inchi'yaton-no.

⁴Nó nda jchaxkón ijye jè kjotéxoma ra 'tse kjoabixan; jìon ra ijye tsixan jìon, jchaxkón ijo-no, nga mì ma kjoachijngi 'siaan. Nga jñā ra ta sískáko ijo-lā nga kjoachijngi 'sín, jè Nainá tsjá-lā kjohi'in.

⁵Kì tà jè níkájno nga isa tse ton mejèn-no nga 'se-no. Katajngo takòn koni 'ki tjín-no, nga Nainá, 'koaá 'sín tsò: “Mì kì tsjin-tákon-la, kō níkjíá síkíjna tajngo-la.” ⁶'Koaá ma-ni nga ngi tjíjngo takén nga ma kixé:

Jè Na'ín-ná basíko-na,

mì kì tsakjon-jiàan tsa mé ra sìlko-na xīta.

⁷Tikítsjen jñā xīta ra tsinchá ndiyá-no nga tsi'kénajmíya-no 'én-lā Nainá; tjí'koa tikítsjen kó'sín kisíjchá ijo-lā kō chjíngi-la koni 'sín nga kjokjiín-lā.

⁸Jesucristo mì kì fahatjiya-lā, tijé-ni ngojñā, kō tijé-ni 'ndi 'ndi, kō tijé-ni skanda ta mé nichjin-nioo. ⁹Kì tà chjàn bi'nde-la ijo-no nga xìn ndiyá fíko-no nga bíndo-no jè kjobítsjen ra kjí'í 'sín bakón-ya ra mì kì 'yaxkon-lā. Isaá nda-ni nga nda kata'se-lā nga'nó inìma-no a'ta 'tse kjonda-lā Nainá, mì 'koa-ni tsa a'ta 'tse tsajmì ra ma chine; nga nímé nga'nó sakò-lā inìma-lā jñā ra ko'sín tjín kjoa títsajin.

¹⁰Jién, tíjna-ná [Jesús ra 'ken-tjì ngajo-ná a'ta 'tse jé-ná] koni jngo kjotjò ra kjongatsja Nainá. Tanga jñā xīta ra takó ya síxá a'ta 'tse kjoa jchínga ra 'tse Ni'ya Tsje ra níkje, tsìn-lā kjohixi nga ya tjábé-lā kjonda. ¹¹Nga jè na'mì ítjòn ra ya síxá, yaá fíko jè jní-lā cho ra biya ya i'nde tsje-lā Nainá nga tsjá

kjotjò mé-ni nga tjàhixìn-là jé-là xitá. Tanga jñà ijo-là cho, xìn i'nde fiko 'taxìn nga baká. ¹² 'Koaá tì'sín kjomà'tin Jesús; a'ta xìn naxindá isìkjiín kjohi'in nga kinì'ken, mé-ni a'ta 'tse jní-là ra ixaájten kjomà isìtsje-ni jé-là xitá naxindá. ¹³ 'Koaá ma-ni, ko'sín kítjokajin-teé naxindá nga tjahítjìngi-lá Jesús ya ñánda nga i'nde'taxìn mé-ni nga tì'koa sikhíín-keé kjosabà ko kjohi'in ra jè isìkjiín. ¹⁴ Nga i a'ta nangi tsin-ná naxindá ra ngi i kájna skanda ta kjiá-nioo, jè inchichiñá-lá jngo naxindá ra 'sà nchrabá. ¹⁵ 'Koaá ma-ni, machjeén-ní nga ki'ta nichjin jeya sikíjnéé Nainá ra a'ta 'tse Jesucristo koni jngo kjotjò ra ñngatsjeé Nainá. Jè machjeén nga ngi ndsa'bé katitjo-ni 'én nga 'kénajmié yá-ni Jesús. ¹⁶ Kì niijchaàjion kjoa ra nda 'nià ko ra bisiko kañá xàngioo; nga jñà kjoa kii, 'koaá 'sín ngoya-la koni jngo kjotjò ra ñngatsja Nainá ra nda sasén-la.

¹⁷ Títjasòn-la jñà xitá ra incha ítjòn-no ra a'ta 'tse naxindá-la Nainá, ko jñà tiná'ya ijòn-la. Nga jñà xitá kii tjíkínda-la kjobinachon-no, ko jñà tjínè-la nga tsjá-la kindá Nainá. Nda títjasòn-la koni 'sín nga kítsò-no mé-ni nga ngi ko kjotsja-la síxá-ni ko mé-ni mì chjá koma-la. Nga tsa chjá koma-la nì mé kjonda sakò-no ra jiòn.

¹⁸ Tijé'tà-la Nainá a'ta tsajin, nga 'koaá 'sín machiya-najin nga nda tjín jè kjobítsjen-najin, nga mejèn-najin nga nda siitjasòn tsje-jin. ¹⁹ 'Koaá 'sín 'ñó bitsá'ba-isa-no nga tijé'tà-la Nainá ra a'ta tsa'an, mé-ni nga katatsjá'nde-ni nga nditon kijchò'tsè india-no.

'Én ra fehe'ta-ni

²⁰ Jè Nainá ra tsjá-ná kjo'nchán ra isikjaáya-ila a'ta 'tse kjobiya jè Na'ín-ná Jesucristo, ra chjingo ítjòn-la forrè, jè ra a'ta 'tse jní-là isindajín jngo-ni kjoa ra mì kjehe'tà nita kjiá-nioo, ²¹ ko'sín kixi katasíkítsajna-no a'ta 'tse nga'tsi kjoa ra nda tjín mé-ni nga ko'sín 'siaan-no koni 'sín mejèn-la ra jè; ko mé-ni nga a'ta 'tse Jesucristo ko'sín katasíko-ná koni 'sín nga sasén-la ra jè. ¡Jeya katijna Cristo skanda ta mé nichjin-nioo! Ko'sín katama.

²² 'Koaá 'sín tíbítsá'ba-no ndí 'ndsé, kata'se-no kjojetakòn nga tiná'ya-la nda nda-la jñà 'én kii koni 'sín nga bijnáchiya-no. Nga ta chibaá-ni 'én ra tjí'ta xajon rakii. ²³ Ko'sín katasijin-no,

jè 'ndsé Timoteo ijyeé tíjnandií-ni ra kjoa 'tse kjohi'in; tsa nditon kj'íí, íko-ná 'kia nga kjín katsíjen-no.

²⁴Nga'tsi-no, tihixo'ta ijye jñà xita ra incha ítjòn-no kò nga'tsi jñà xita naxindá-là Nainá. Jñà ra Italia i'nde-là síhixo'tá-te-no.

²⁵Nainá katatsjá-no kjonda-là nga'tsi-no.